

Date – 13/01/2025

Time - 18:30 -18:40Hrs

REGIONAL NEWS BULLETIN

HEADLINES (EVENING)

1. Political Party ten kumin atan an party office mipui dawr theihin vawiin khan an hawng tan.
2. All Mizoram VC Association (AMVCA) ten VC term pawh tawi chungchanga sorkar an khinna High Court in a ngaihtuah ni, vawiin khan AMVCA te an inhnukdawk.
3. Prime Minister Narendra Modia chuan vawiin khan Central Kashmir-a Ganderbal district-a Sonamarg Tunnel a hawng.
4. Sipai hotulu ber General Upendra Dwivedi chuan ramchhung hmarlam ramriah thil pawl liantham a thleng lo tih a sawi.

<><><>

PARTY OFFICE RE-OPEN

Political Party ten kumin atan an party office mipui dawr theihin vawiin khan an hawng tan a,

ZPM General Headquarters hawna inkhawmah ZPM President Pu Lalliansawta chuan thusawiin, Kalphung thar mipui Sorkar chuan a dinchhan ang ngeiin Mizoramah hmasawna thar a thlentir mek a ti a, vawiin thlenga Kalphung thar mipui Sorkar kal dan han thlir hian Mizoram chu a la dingchhuak ve ngei dawn niin a lang a, hmasawna chhenfakawm sawi tur hnutchhiah chhoh mek a ni, a ti.

He hunah hian ZPM Hla thar “ZPM VUL ZEL ANG CHE” tih Pu C.Lalmuansanga phuah chu Chief Minister Pu Lalduhoma’n a tlangzarh a ni.

MNF Party Office Mizo Hnam Run hawnaah MNF President Pu Zoramthanga chuan thusawiin - VC thlan hun pangngai chu August thla lam tur a ni a, chhan tha tak awm miah lovin ZPM sorkar martial law-in February-ah thlan tur tiin an pawh tawisak a. Hei hi a nihphung tur a ni lo a ti a, Lengpui airport Air Force kuta pek an tum ngawtte chu khawvela awm ngai lo, sipai kuta Mizote hrawk rehtir flat ang a ni a, MNF chuan a a tawp thlengin a dodal dawn a ti.

Pu Zoramthanga chuan Buhfai man a letin vawi lehkhatah an tito thut chu tha an ti lo a, MNF tlinpui kum a thlen hunah an ennawn dawn a, Petrol leh diesel pawh cheng hnih khat mai ni lo, cheng sariha an tito thut chu MNF chuan a ngaihtuah tha leh dawn," a ti.

SASCI chu ZPM in an duhdanin an kalpui a, MNF hnathawh sa chhonzawm lovin an insem a, utilization certificate an pek mumal theih loh avangin kum khata Rs. Vbc 500 vel hmuh thin kha, Rs vbc 250 chu an chan der tawh a, kumin hian Delhi khawngaihna an dawng lo a nih chuan an buai hle dawn a ti bawh a ni.

ZPM sorkar chu sum enkawl kawngah a ngaihna awm ngang lo ah puhin lawh tur an puk reng a, contractor bill an pe thei lo a. Khawiah pawh pawisa van thu bak sawi tur a awm lo, a ti a ni.

Mizoram Pradesh Congress Committee chuan Bhavan hawna inkhawm, Golden Hall, Congress Bhavan ahkan hmang a, party President Pu Lal Thanzara chuan thu sawiin, tunlai hian Ferbruary ni 20 a lar hle a, ZPM sawrkar hian VC Term pawt tawiin Febuary ni 19 ah a ti tawp a. Chumi hma chuan VC inthlan a ngai ngei ngei a ni. Sawhthing an lei theih dawn leh dawn loh hriat a nih hma inthlan zawhfel an duh a, VC inthlan zawh ah chauh sorkarin sawhthing lei a tum a ni, a ti.

Congress party chu a sorkar leh chuan Mizoram mipuite tan NLUP a tharthawh leh dawn tih a sawi nawn a, Pu Lalthanzara chuan Ram leh mipuite thatna tura sawrkar hmalakna te chu Congress Party chuan a thlawp zel dawn a ti a, Boruak thianghlim a awm theih nan Halpuah leh Halmawi Krismas leh Kumhlui thlah zana Sawrkarin a khap chu Kohhran leh Central YMA te thlawpna avangin kum dang aiin mipuiin an uar lo chu a lawmawm takzet a ni a ti.

Lengpui Airport an siam laia Choak bak a tum lovang an tih khum thin chu tunah tangkai takin mipuiin an hmang mek a, amaherawh chu tihral chak tlat an awm chu a pawh hle a ni, a ti.

<><><>

REIEK

Reiek Tlang Tourism Development Board chuan Reiek tlang lawn tur te tan lirtheia thlen theih anih hnuah harsatna hrang hrang a thleng chho tih sawiin, helai tlang lawn tur te tan ruahmanna siam thuai an beisei tih an sawi.

Reiek Tlang Tourism Development Board Secy Pu Vanlalmaka chuan Akashvani zawhna chhangin Sorkarin kawng a siam that hnuah nikum November thla tir khan tlanga tlan chho lirthei nasa takin an pung a, traffic jam avanga buaina a thlen bakah cancer damdawi anga thang, nauban a rem duak bawk a, hemi avang hian nikum November ni 3 khan Board an thutkhawm a, gate siamin lirthei lut tur an dang lailawk a, Gate tichhiaa mipuite an la luh zel avangin lirthei luh man two wheeler-ah cheng 100 leh lirthei ke 4 nei cheng 500 an la taa, ni 2 chiah an kalpui hman tihah traffic jam nasa vang bawkin an tihtawp leh a, hemi hnu hian tlang thleng thei tur bik lirthei service an siam ta tih a sawi a ni.

Pu Vanlalmaka chuan mipuiin lirthei hmanga an chin phul nasat avang hian Reiek tlangin a tawrh an hlauh avangin lirthei service tir an ni tih a sawi a, mipuite a tam thei ang ber kein la kal chhunzawm se an duh thu an sawi a. Tar leh upa, damlo chaklo te tan lirtheia an kal theihna remchang atan leh rikrum thilah pawh kawng chu tangkai taka hman ni se an duh a, amaherawhchu lirthei nei zawng zawngin an zawh chuan harsatna liantham a thleng thei a ni a ti.

Tourism Director Pi R. Lalrodingi chuan Reiek tlang chu tlang taka an department in an va relbawl loh thu a sawi a. Minister a zin mek thu sawiin a lo haw velah Reiek Tlang Tourism Development Board te leh department te ruahmanna tha zawk a awm zel beiseiin an thutkhawm dawn tih a sawi a ni. Kan corr report lo ngaithla ang.

<><><>

VC ASSN

All Mizoram VC Association (AMVCA) ten VC term pawh tawi chungchanga sorkar an khinna High Court in a ngaihtuah ni, vawiin khan AMVCA te an inhnukdawh.

AMVCA President Pu K. Lalngaizuala chuan vawiin khan an inhnukdawh chhan Akashvani hrilhin AMVCA chu kum 1986 atanga ding tawh ni mahse dan ang takin sorkarah an in register loa, hei vang hian an case chu High Court in a hnawl a hlauhawm tih a sawi a. An Ukil ten inhnukdawh mai thaa an hriat avangin an inhnukdawh ta tih a sawi a, naktukah a tharin high court-ah case thar an thehluh leh nghal dawn thu sawiin, AMVCA member ten inlungual takin hma thar an lak leh dawn a ti.

Byte of K. Lalngaizuala.....

Puan tawh angin AMVCA hian nikum December thla khan sorkar atanga VC term pawhtawina nikum November ni 21-a a tihchhuah chu khin tumin hma an la mek a ni a. Village Council term kal lai tih tawi a nih thu hi Local Administration department thuchhuah ang chuan kumin February ni 19-ah a tawp dawn a. Financial year thar lo awm tura inthlan hautak tak tak pali awm tur tih zangkhaina tur leh sorkar in sum renchem a duh vangin Village Council term kallai chu thla 6 in a pawt tawi tih LAD Minister Pu C. Lalsawivunga chuan a lo sawi tawh a ni.

<><><>

MSCPCR

Mizoram State Commission for Protection of Child Rights chuan tunhnai khan naupang kum tling lo Social Media hrang hranga phochhuaktu lakah January ni 9 khan Cyber Crime Police Station Aizawl-ah FIR a thehluh.

MSCPCR chuan tunhnai khan naupang kum tling lo, Dan nena inrem lova che chu Social Media hrang hrangah naupang hming, thlalak, video leh address a nihna tilang thei tura pholan leh puanzar a nih avangin a phochhuaktu YouTuber leh Facebooker lakah FIR hi an thehluh a, MSCPCR Chairperson Pu Jimmy Laltnanmawia chuan tunhnaia Internet Social Media - YouTube, Facebook, WhatsApp leh Digital Media platform hrang hranga naupang Dan nena inrem lova che te hming, nihna, thlalak, video leh address te tarlan a ni leh thin chu an ngaimawh tih sawiin khap tlat ani an ti a, naupangte hming, address, thlalak, video leh a dangte pholan a nih chuan nakin zela naupangte an lo than len huna khua leh tui tha an nih theihna tur kawng daltu leh midang ten an chhinchhiah bik theihna tur thil pawt tak a nih avangin Dan chuan a khap tlat a ti a, Dan bawhchhetu chu thla 6 thleng lung-in tantir leh cheng nuai 2 thleng chawitira hrem theih an ni tih sawiin Commission chuan Dan bawhchhetute chu hrem an nih theih nan hma a la zel dawn tih sawiin Internet Social Media leh Digital Media hmang tute chu fimkhur turin a chah bawh.

<><><>

PIGGERY AWARD

Vawiina Pune-a Entrepreneurship Development Conclave 2025 hmanah Lengte-a SR Piggery Farm neitu Pu Zorinpuia chuan Piggery Entrepreneurship lama titha lawmman a dawng.

Pu Zorinpuia hian National Livestock Mission Scheme hnuuia Piggery Farm dinna tura insak atanga ranvulh thlengin monitoring leh inspection zawng zawngte tha taka a paltlang hnuah subsidy thlenga dawng tawhte zingah a zo hmasa leh ti tha ber zingah thlan a ni a. He conclave hi sorkar laipuaia Department of Animal Husbandry and Dairying chuan thlengin, Union Minister of State for Fisheries, Animal Husbandry and Dairying Pu George Kurian leh mipawh tak takte hnen atangin thusawi ngaihthlak a ni a. National Livestock Missiona hmalaknate thirho a ni a, sawihona hun hman a ni bawk.

Mizoram chu ramchhunga National Livestock Mission-Entrepreneurship Programme (NLM-EDP) a ti tha zual 10 thlanchhuah zingah telin, North East State-te zinga ti tha ber a ni bawk a. National Livestock Mission Scheme hian sa, bawngnhute, artui leh ranchawa intodelhna tura hmalatute tanpui nan subsidy a pe thin a ni. Entrepreneurship Development Conclave 2025 ah hian Mizoram AH & Veterinary Department hotute an tel a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

PM

Prime Minister Narendra Modia chuan vawiin khan Central Kashmir-a Ganderbal district-a Sonamarg Tunnel a hawng.

BYTE

He hunah hian Union Minister Nitin Gadkari, Dr.Jitendra Singh, J&K Lt. Gov Manoj Sinha, Chief Minister Omar Abdullah, Senior UT Minister te, Parliament Members, Legislator leh senior Tunnel Project Official te an tel a ni. Prime Minister hian Tunnel chhungah hian lutin a fang kual bawk a. Sonamarh Tunnel hian Gagangeer leh Sonamarg inkar tlan chhung chu minute 20-25 laiin a ti tlem dawn a ni.

<><><>

ARMY CHIEF

Sipai hotulu ber General Upendra Dwivedi chuan ramchhung hmarlam ramriah thil paw liantham a thleng lo tih a sawi. Vawiina Annual Press Conference a neihah General Dwivedi chuan siapite chu engpawh hmachhawn thei turin an inpuahchah tih sawiin ramriah hmasawinna ruhrel tha tak tak din chu sipaite ngaihpawimawh a ni a ti bawk. General Dwivedi chuan Jammu and Kashmir buaina pawh thunun anih thu sawiin firfiakte chetna hmunte chu khualzinte tlawh a ni chho mek a ti bawk. Manipur chungchang sawilangin Army Chief chuan security force leh sawrkar ten theihtawp an chhuah avangin tun dinhmunah boruak a pangngai a ni a ti bawk.

<><><>

MAHAKUMBH

Khawvel huapa sakhaw thila inkhawmpui lian ber Mahakumbh chu vawiinah Prayagraj ah tan a ni a. Sakhaw biakzina kal mi maktaduai chuangte chu Ganga, Yamuna leh Saraswati te infinna Triveni Sangam-ah inchiah thianglim turin an kalkhawm ang. He hunpui hi Febraury ni 26, Mahashivaratri thleng hman a ni dawn a. Niminah khan mi nuai 50 chuang Triveni Sangam ah hian an inchiah a ni. Mahakumbh hman anih dawn avangin sawrkar chuan venhimna khauh takin a kalpui a ni.

Union Tourism and Culture Minister Gajendra Singh Shekhawat chuan Maha Kumbh 2025 chu sakhaw thila inhmukhawm mai niloin thil pawimawh tak khawvel khualzinte pawh hiptu a ni a ti a. Akashvani News in a kawmnaah he thu hi sawiin Pu Shekhawat-a chuan he hunpui thleng turah hian Union Tourism Ministry chuan hmalakna chi hrang hrang a kalpui a, tualchhung leh rampawn atanga khualzinte hip turin theihtawp a chhuah a ni a ti.

<><><>